

Basi wewe, mwanangu, uwe hodari katika neema iliyo katika Kristo Yesu. Na mambo yale uliyoyasikia kwangu mbele ya mashahidi wengi, hayo uwakabidhi watu waaminifu watakaofaa kuwafundisha na wengine—2 Timotheo 2:1, 2.

Mosomo yanayopatikana katika maneno ya Paulo kwa Timotheo yana umuhimu mkubwa sana kwetu leo. Anamwamuru “kuwa hodari”—katika hekima yake mwenyewe? La, bali “katika neema iliyo katika Kristo.” Yeye atakaye kuwa mfuasi wa Yesu hapaswi kutegemea uwezo wake mwenyewe, au kujitumaini. Wala hapaswi kudhoofika katika juhudi zake za kidini, kuepuka majukumu na kubaki bila ufanisi katika kazi ya Mungu. Anapaswa kuteka nguvu kutoka kwenye chanzo thabiti na salama, ambacho hakiwaangushi kamwe wale wanaotaka kuwa na nguvu ya Mungu. Ombi kwetu ni “uwe hodari katika neema iliyo katika Kristo Yesu.” Ikiwa Mkristo anahisi udhaifu wake, kutoweza kwake, kwa kuweka Imani yake kwa Mungu, atapata neema ya Yesu itoshayo kwa kila dharura.

Askari wa Yesu lazima akabiliane na aina nyingi za majaribu na kuyapinga na kuyashinda. Kadiri pambano linavyokuwa kali ndivyo neema inapotolewa kwa wingi ili kukidhi haja ya roho; na asili ya neema iliypokelewa itaongeza uwezo wa Mtumishi wa Yesu kumjua Mungu na Yesu Kristo aliyemtuma. Nafsi ya aminiye itatafuta kwa shauku kubwa kujua na kuelewa zaidi ukweli na haki ya Kristo.

Wote wanaosonga mbele katika maisha ya kiungu watakuwa na uwezo zaidi wa kutafuta ukweli kama hazina iliyofichwa, na watauweka ukweli kwa nafsi zao wenyewe. Wale wanaosonga mbele katika maisha matakatifu watakuwa na uwezo zaidi wa kuatafuta ukweli kama hazina iliyositirika na watauhifadhi ukweli nafsini mwao wenyewe. Mkristo wa kweli ataelewa kile inachomaanisha kupitia uzoefu wa mapambano makali na ya kuchosha; lakini atazidi kuongezeka katika neema ya Yesu ili kukabiliana na adui wa nafsi yake kwa mafanikio, ambaye hufanya kazi kupitia mawakala wa kibinadamu ili kuwaharibu watumishi wa Kristo.

Kwa kupita katika mateso makali ya majaribu, mfuasi wa Kristo ataelewa vyema zaidi njia za Mungu na mpango wa ukombozi na hatakuwa asiyejua hila za adui. Giza litaisonga nafsi yake wakati fulani; lakini nuru ya kweli itaangaza, miale angavu ya Jua la Haki itaondosha majonzi; na ingawa Shetani anatafuta kwa kila njia kumvunja moyo kwa kuweka vikwazo mbele yake, kwa njia ya neema ya Yesu atawezeshwa kuwa shahidi mwaminifu wa mambo ambayo ameyasikia kutoma kwa mjumbe wa Mungu aliyevuviwa.

Haudharau wala kuupuuza ujumbe alioupokea, lakini anapeleka maarifa yake kwa watu waaminifu, ambao kwa upande wao wanaweza kuwafundisha wengine pia. Katika kuwasilisha nuru kwa wengine, Mkristo anathibitisha ukweli wa neno kwamba “Njia ya wenye haki ni kama nuru ing’aaoyi, Ikizidi kung’aa hata mchana mkamilifu” (Mithali 4:18) **(The Review and Herald, Juni 16, 1896).**